

Morena ke mathomo a tšohle mo bophelong bja gago

Thero mo Maleaki 3:10

Palo ya Beibele: Maleaki 2:17-3:18

Temanathero: Maleaki 3:10

Ke badile ka ga se mabakeng a bjale: go a makatša gore R 50 e lebega e le tšhelete ge o e tsenya mo moneelong, empa e le e enyane ge o e ya go reka ka yona lebenkeleng. Go a makatša gore nako ya ura ke e telele ge o bala Beibele, empa yona ura ke e nenyane ge o lebeletše kgwele ya dinao. Go a makatša gore go bothata gore batho ba gopole thero empa go le bonolo gore ba ka gopola ditaba tšeo di lego gona. Go a makatša gore ga bonolo re ka dumela dikuranta, empa ra boa ra belaela Lentšu la Modimo. Go a makatša?

Go ba re ka re: go a tšošā!

Tabataba: Morena ke mathomo a tšohle mo bophelong bja gago

Moporofeta Maleaki o phetše mengwaga a ka bago e 400 pele ga matšwalo a Kriste. O phetše mo nakong yeo tirelo ya Modimo e bego e be e le maemong ao a sego botse. Maleaki o be a biditše ke Modimo go ba moporofeta le go botša batho nnete. Nnete yeo re e humana mo pukung ye. O bolela ka ga gotla ga morongwa / lengeloi wa kgwerano. Re a tseba bjale ka kereke ya Testamente e Mpsa gore yo ke Mophološi wa rena Jesu Kriste. Maleaki o re: Morongwa wa Morena o tlatla ka nako yeo re sa e letelago mo tempeleng. Gomme ka nnete dilo di tlilego direga! Maleaki gabotse o a kgalemela. Ke mang yo a ka emago ka letšatši la gagwe la gotla? Maleaki a bapetša ka go hlaloša. Morongwa wa Morena o tlilego ba bjalo ka mollo wa go theošwa. Se se šupa tshepedišo ya go dira silefera goba gauta goba tshipi, ge e tološwa, ka maikemišetšo a go kgetha yeo e hlwekilego le yeo e lego ditšhila.

Tšohle tšeo di lego ditšhila di tlile go seka gomme tša gona go lahlwa. Maleaki o tšwela pele ka go re: Morongwa o tlile go ba bjalo ka leswela. Sešipe sa leswela se bjalo ka se hlwekiši seo se hlatšwago diaparo tša ba bjalo ka leswela.

Bjale morongwa wa Morena o tlile go kgethafatša barwa ba Lefi, baperisita bao ba swanetšego go phetha mediro a bona ka tempeleng. Mohlomongwe batho ba ba apešitšwe diaparo tšeo di hlwekilego, empa gona bjale maphelo a bona a tletše dibe. Morongwa wa Morena o tlile go hlatšwa botho bja bona ka tempeleng. O tlile go lebelela gore dihlabelo ka moka di tlišwa ka tsela yeo e lokilego, gore Modimo a tle a kgone go itumela ka dinoko tša dihlabelo tšeo di išwago godimo go yena. Gobane matšatšing a Maleaki Modimo o be a sa amogele dihlabelo tšeo ba mohlabelago tšona.

Lebelela, Morongwa wa Modimo o tlile go tla o sa itukiša! O tlile go ahlola bohle ba phelago mo sebeng. O tlile go ema kgahlanong le baikaketši, le diotswa, le bohle, bao ba sa tsebego Modimo, bao ba sa yego ka ditaelo tša gagwe.

Modimo ga a fetoge mengwaga ka moka, Maleaki o re. Bjalo hlokomela! Batho ba fetoga. Seo e bego e le sebe mabane, goba ngwaga o fetilego, goba mengwaga e lesome ye e fetilego, batho ga ba sa bona e le sebe. Empa hlokomela, Modimo le ditaelo tša gagwe e sa le tšona le lehono! Modimo ga a forwe. Modimo ga a thaetšege. Goba mohlomongwe o ka nagana, nka se ke ka utswetša Modimo. Ye ke gopolo yeo baperisita ba matšatšing a Maleaki ba bego ba na le yona. Empa Modimo o a ba phafoša: temana ya 8: 'Ana motho a ka utswetša Modimo? Empa lena le a nkutswetša. Empa le a botšiša, re go utswetša ka eng?' Bjale Modimo o a araba: 'Ka meneelo le ka dimpho. Le ka tlase ga thogako, naga ka moka – gobane le a nkutswetša. 'Tlišang karolo ya lesome mo ngwakong, gore mengwakong ya lena go be le dijo. Ntekeng ka se, o realo Morena yo maatla ohle.'

Bjale nke ke le botšišeng, bana bešo: Ana le utswetša Modimo? Goba ke botšiše ka tsela e: Ana le tliša karolo ya lesome? Ana o tliša ka mokgwa o o swanetšego ka gona go Modimo? Ga e be bonolo: ge o sa dire bjalo, O UTSWETŠA MODIMO! Bjale molaetša o o lebišitše wena ka bowena ka tsela ye Modimo o tlilego go otlala! Goreng o sa tliše karolo ya lesome ka botshepegi? Mohlomongwe o na le letšhogo gore seo o tlilego go ba lesone e tlo ba se senyane mo go wena? Goba o tšhoga gore o ka se be tšhelete ye e lekanego kgwedi ka moka? Bjale theetša temana ya rena. Temana ya rena e na le molaetša o bohlokwa go wena: Tliša ka moka karolo ya lesome ngwakong wa Morena, gore o tle o be le dijo ngwakong wa gago. NTEKENG KA SE, o realo Morena yo maatla ohle, gomme le bone ge nka se bule mejako ya legodimo gomme ka tšholla mahlogonolo ao o ka se bego le phaphuši a go a tlatša ka go yona! Ntekeng! Morena o realo. Bea nna mathomong a dilo tšohle bophelong bja gago! Leka! Gomme o eme o letele! Morena o go netefaletša se! Ke tlile go go bulela mejako ya legodimo! Pula, le matlorotloro a di tšhegofatšo! Ke tlile go go thekga!

Bana bešo, ana le ikemišeditše se? Ana le ikemišeditše go bea karolo ya lesome pele ga tšohle mo mogolong wa gago?

Ana o a tseba, gore le ka matšatši ao go be go na le batho bao ba bego ba sa tliše karolo ya lesome ka moka mo tempeleng. Ka nnete, ba be ba sa phuthegile, le go tliša dimpho, le meneelo. Go ya ka molao wa Moshe se bohlokwa ke gore sehlabelo se tlišetšwe Morena, gomme ka morago motho le moperisita ba be ba dumeletšwe go ka ja masalela a nama ya sehlabelo. Ba be ba na le go gontši go ka ja! Empa ke eng seo re se bonago? Moperisita o be a sa hlabe karolo e botse ya phoofolo, empe e be a ipeela yona ka thoko. Nagana ka barwa ba Eli ka ge re bala ka bona mo pukung ya mathomo ya Samuele kgaolo ya 2. Nako le nako ge motho a tlišitše sehlabelo, bahlanka ba baperisita ba be ba etla ba tšea nama e le ka gare ga pitša. Le pele ga ge karolo yeo e nonnego e ka fiša (monono / makhura e be e le karolo e botse ya phoofolo), bahlanka ba baperisita ba be ba fihla gomme ba re: e nee baperisita. Gomme ge motho a ka araba a re: empa, motho o swanetše go nea Morena yeo e nonnego gomme bahlanka ba baperisita ba be ba re: Theetša, e nee ka pele gona bjale, goba re tla e tšea ka kgang. Ka tsela e molao o mobotse wa Modimo o be o tlošwa. Baperisita le batho ba be ba sa phedišane ka khutšo. Baperisita ba be ba fora batho, gomme ba tšea tše botse ba ipha tšona. Gomme batho le bona ba thoma go fora baperisita, ba sa tliše karolo ya lesome ka mo go swanetšego mo tempeleng. Go be go na le balsiraele bao ba bego ba se sa tla, mo tempeleng. Gomme ba lebala ka gohle gore ke mang yo ba swanetšego go mo tšhaba, le gore karolo ya lesome a swanetše tirelo ya Modimo!

Gomme bjalo moporofeta Maleaki o ba phafoša gape. Le utswetša Modimo! Le ipha karolo ya lesome! Gomme, moporofeta o re, ge le dira bjalo, le se lebelele ditšhegofatšo tša Modimo! Aowa, letela Morongwa wa Modimo, gobane o tlile go le otlala! O tlile go hlatšwa!

Bjale go phethagatša mantšu a moporofeta lehono, ke tla bušeletše sehlogo sa thero ya rena: Bea Modimo mabakeng a dilo tšohle bophelong bja gago! Modimo le tirelo ya gagwe mo mathomong a mabaka a gago le a budgete ya gago.

Lemoga gore ke ka lebaka la hlokomelo ya gagwe gore o a phela, gore o itekanetše, le gore o kgona go šoma, go ba le letseno, goba tšhelete yengwe, goba le tše dingwe.

Gomme, sa bobedi, leka Modimo! Ana o ikemišeditše? Ana o ikemišeditše go mo nea karolo ya lesome mathomong a kgwedi? O se ke wa emela letšatši la mafelelo la kgwedi, go mo nea tšhelete yeo e šetšego. Mo nee mathomong a kgwedi ge o sa na le tšhelete ka moka. Thoma ka go bea karolo ya lesome ka thoko, gore o itliše mo kerekeng! Ana o ikemišeditše? Modimo o re: Nteke! Ge o dira se, o tlile go lemoga, gore ke tla bula mejako ya legodimo gomme ka go nea disthegofatšo. Ka nnete mo go motho e lebega bjalo e ke e be kgahlanong. Empa se ke nnete, E ŠOMA KA MOKGWA O. Ge o nea Modimo ka bontši, o tlile go amogela ka bontši. Ana ga se Modimo yo a lebeletšego tšohle lefaseng batho ka moka bathwadi ka moka, ana tšhelete ka moka mo lefaseng ga etšwe go Modimo le gore ana ga a kgone go e tšea le go e diriša mo thatong ya gagwe? MO TSHEPE! Se ke se bohlokwa. Se o ka se kgethago, ge o sa mo tshepe, go lokile, o tla

dula o le modidi. O le modidi mo moyeng, le ka diphahlo. Empa ge o tshepa Modimo, gomme o mo neela ka pelo yohle, o tlile go lemoga gore o a huma, o huma moyeng, gamogo le phahlong. Modimo a ka se ke a swara tšeo o di hlokago letšatši le letšatši.

O se ke o a ipea ka tlase ga thogako. Bjalo ka ge moporofeta a bolela ka batho matsatšing a gagwe: Le ka tlase ga thogako – naga ka moka – gobane le utswetša Modimo. Le utswetša Modimo ka go se mo neele moneelo le dimpho. Tlišang karolo e lesome mo ngwakong gore gohle go be le dijo mo mengwakong ya lena. Ntekeng ka se, go realo Morena Modimo yo maatla ohle, gomme le tle le bone ge nka se bule mejako ya legodimo gomme ka tšholla dišhegofatso tšeo le ka se bego lephaphuši ya go di tlatša. Ke tlilego thibela ditsie gore di se je mabele a lena, le merara a lena, e ka se we dienywa, o realo Morena Modimo yo maatla ohle. Bjale ditšhaba ka moka di tlile go go bitša mo šegofatšwa, gobane lefase la gago le tlilego ba le nonnego, o realo Morena Modimo yo maatla ka moka.

Amene.